

gustav / September 12, 2013 10:44AM

[毘盧遮那廣大境，無邊無量難思議，我承佛力為汝說，令汝深心轉清淨 ... 《大方廣佛華嚴經卷二十二》](#)

◎

[0765b06] ◎爾時，善財童子白言：「聖者！發阿耨多羅三藐三菩提心，修此妙行，其已久如？」

[0765b07] 夜神言：「善男子！如汝所問此事難知、難信、難解、難證、難入、難可顯示、難可生起、難可演說，一切世間諸天及人、聲聞、獨覺皆不能知，唯除如來威力所加，善知識所攝，修集廣大福德智慧，其心堅固，欲樂清淨，無下劣心，無雜染心，無諂曲心，無散亂心，無鄙恚心，無極聞心，得普照曜開敷一切智光明心，發普利樂成熟一切諸眾生心，一切煩惱及以眾魔無能壞心，起必趣向一切種智無障礙心，不樂世間一切生死染污樂心，能樂觀一切如來清淨妙樂，能勤除滅一切眾生憂悲苦海，能修一切諸佛如來功德法海，能觀一切諸法實性虛空境界，能具一切廣大甚深清淨信解，能超一切生死暴流，能入一切如來智海，能決定到無上法城，能勇猛入如來境界，能速疾趣諸佛智地，能即成就一切智力，能於十力已得究竟；如是之人乃能於此能知、能入、能信、能解、能持、能了、隨順修行。何以故？此是如來智慧境界，一切菩薩尚不能知，況餘眾生？然我今當承佛威力，欲令調順可化眾生意速清淨，欲令修習善根眾生心得自在，隨汝所問，為汝宣說。」

[0765b29] 爾時，開敷一切樹華安樂主夜神欲重明此義，觀察三世如來境界而說偈言：

「佛子汝今之所問，諸佛無邊深境界，
難思剎海微塵劫，具足演說無能盡。
非諸弊惡貪恚癡，憍慢無明惑所覆，
垢心纏縛眾生等，能知諸佛寂靜法。
非諸諂誑濁亂心，常隨慳嫉情無捨，
煩惱業繩之所繫，而能了知佛境界。
非是執著蘊界處，心恒不捨於身見，
心倒想倒見倒人，能入如來寂滅地。
寂靜甚深諸佛境，本性真常離分別，
非著諸有生死人，入此平等無依法。
生於諸佛種姓家，一切如來恒守護，
能持法王教藏者，此仙智眼之境界。
親近真實善知識，愛樂白法無厭足，
專求佛力受法雲，彼聞此法生歡喜。
心恒清淨無分別，不著一切如虛空，
智燈自在破無明，此無垢者之境界。
以大慈悲覆世間，遍入三世眾生海，
隨宜利樂無邊際，此深行者之境界。
心常歡喜無諸著，一切所有皆能捨，
樂說平等施眾生，此無著者之境界。
心無垢濁離諸過，究竟調伏無憂悔，
隨順佛教能具修，此無垢者之境界。
心無動亂無分別，能普覺知諸法性，
遠離一切諸惑業，此解脫者之境界。
心無疲厭常無退，勇猛勤修一切智，
安住增上淨戒中，此大丈夫之境界。
其心深入諸三昧，究竟清涼無熱惱，
已修一切智海因，此寂靜者之解脫。
了知諸法差別相，善入無邊深法界，
普度群生靡有餘，此慧燈者之解脫。
了達眾生真實性，於諸有海無所著，
如影普現心水中，此先導者之解脫。
從於三世諸佛海，方便願種而出生，
盡諸劫剎勤修行，此普賢者之解脫。
普入一切法界門，悉見十方諸剎海，
亦見其中劫成壞，此無二者之境界。
十方剎海極微中，悉見佛坐菩提樹，
成等正覺化群生，此無礙眼之境界。」

汝從無量大劫海，親近承事善知識，
為利群生求正法，聞已憶念無遺忘。
毘盧遮那廣大境，無邊無量難思議，
我承佛力為汝說，令汝深心轉清淨。

～ 《大方廣佛華嚴經卷二十三》，罽賓國三藏般若奉詔譯 ([CBETA全文](#))
